

羊村建築師




香港粵語版

或許每個世代內心懷抱著改造世界，
我的世代知道在這個世代是無法做到，
而他的任務或許更大，
在於阻止這個世界的崩解。

——卡繆

〈一九五七年諾貝爾文學獎得獎演說〉



我嘅好徒弟，
你哋已經學晒我所有嘅知識。
係時候到你哋為羊村起屋喇！

我起嘅屋會係羊
咩咩最鐘意嘅！



羊師傅



羊小影



我嗰間就會係最靚嘅！

我嘅屋一定會係最堅固安全嘅！



羊小書



羊小博

你哋唔好乜都爭餐飽，記得有困難要互相幫助呀！


三隻小羊返到屋企，絞盡腦汁，
終於將夢想嘅屋仔畫咗出嚟，
每間都係佢哋嘅心血。






羊小影用羊咩咩最鐘意食嘅青草，
堆咗一間草屋出嚟。


風吹過青草嘅「沙沙」聲，
羊咩咩聽到都覺得好輕鬆自在。





羊小書就用環保木材疊了一間木屋出嚟。

輕敲木頭嘅「咚咚」聲，
好似樂器噉樣為羊咩咩嘅工作打拍子。






咚咚~

羊小博用堅硬嘅磚頭砌咗一間磚頭屋。
不過磚頭碰撞嘅「彭彭」聲，
就令好多羊仔都避到遠一遠。





自從有咗自己嘅屋仔，
三隻小羊終於有地方做自己想做嘅事。

羊小影開咗一間戲院，
為羊咩咩播佢哋鐘意嘅電影，
又送上青草同爆谷。



羊小書開咗一間書店，
入面放晒羊咩咩鐘意嘅故事書，
又為羊仔講故事。



羊小博開咗一間博物館，收藏好羊村嘅文物，
畀羊咩咩學習羊村嘅歷史。





點知有一日，大灰狼無啦啦宣佈新嘅規矩！

所有羊咩咩起屋仔都要大灰狼批准，
大灰狼唔鐘意嘅屋仔全部都要拆！



三隻小羊聽到依個消息都好驚，
即刻返入屋仔鎖好門窗！



大灰狼好快就嚟到草屋檢查，
佢睇見羊咩咩嘅戲院就好嬲噏講：

呼~

羊咩咩只可以睇我批准嘅電影！
其他通通都唔得！




大灰狼吸一啖大氣，呼~呼~ 就將草屋吹碎咗！



小羊匆匆逃走到木屋入面。

不過，大灰狼睇見羊咩咩嘅書店又好嬲噏講：

羊咩咩只可以讀我批准嘅故事書！
其他通通都唔得！








吹氣吹唔霖木屋，大灰狼就用芭蕉扇，
呼~呼~ 就將木屋撥霖咗！

兩隻小羊再逃走到磚頭屋入面。
不過，大灰狼睇見羊咩咩嘅博物館又好嬲嘅話：

羊咩咩只可以知道我批准嘅歷史！
其他通通都唔得！




呼~



撥扇撥唔霖磚頭屋，大灰狼就用電動大風扇，
呼~呼~ 就將磚頭屋刮霖咗！



三隻小羊好驚噉跑咗出嚟，
大灰狼同埋手下追住羊咩咩，
仲差啲就捉到佢哋。






三隻小羊左閃右避，
好彩路面上有其他羊咩咩嘅幫手，
佢哋先搵到一個地洞匿埋，避過咗大灰狼嘅追殺。



..

欸？點解入面咁光嘅？

..





三隻小羊都好好奇，
於是佢哋就沿地洞行咗入去。



原來，已經有好多羊咩咩一早嚟到依到！
嚟到地底，依個連大灰狼都搵唔到嘅地方，
羊咩咩繼續分享鐘意嘅電影同埋故事書，
又一齊學習羊村嘅歷史。





喺地上面，
 羊咩咩都繼續努力講羊話、推廣羊村嘅文化，
 又堅持寫信畀大灰狼韃住嘅羊仔。
 更加有羊仔唔怕懲罰，勇敢嘅揭穿大灰狼嘅大話。



咩~



咩~



咩~




咩~



咩~



咩~



大灰狼的真相

羊村文化



即使大灰狼係羊村幾霸道都好，
羊咩咩都決定守護好地下嘅堡壘。
終有一日，
羊村一定可以變返做屬於羊咩咩嘅羊村！

如果你係羊咩咩，
你又會唔會一齊守護羊村地下嘅堡壘呢？





羊村建築師／公民社會與歷史記憶

對應「該輪到你們為羊村蓋房子啦」

反送中運動標誌住一整個時代香港人嘅政治啟蒙。一方面，既有嘅公民組織都克盡己任嘅去動員同理倡議；另一方面，新組織亦好似雨後春筍嘅成立，將零散嘅個體連結起嚟，令政治行動變得可能。



對應「三隻小羊終於有地方做自己想做的事情」

極權之下，當權者掌握書寫歷史嘅權力，但公民社會冇放棄過傳承真相嘅使命。無權勢者或拍攝，或書寫，或收藏香港人奮鬥嘅見證——依場係一場記憶對抗遺忘嘅鬥爭。




對應「新規矩」


不過，政權為求壓制異見，唔單止強加港區國安法喺港人身上，更喺塵封多年嘅殖民惡法入面翻箱倒櫃，唔放過任何打壓民間組織嘅機會。



2021年10月，港府修訂《電影檢查條例》，禁止「不利於國家安全」嘅電影上映，多套以反送中運動為題材嘅電影因而上映無期，當中包括係第58屆金馬獎榮獲最佳紀錄片嘅《時代革命》，同埋入圍最佳新導演、最佳剪輯嘅劇情片《少年》。即使有電影早係條例修訂前已獲批放映，例如係山形國際紀錄片電影節獲獎嘅紀錄片《理大圍城》，亦因為被官媒批鬥施壓而要取消公映。



同時，民間組織嘅放映活動轉趨地下化，但仍然係港府著力打壓嘅目標。港府曾經派卧底「搗破」民主派人士嘅閉門放映活動，並以防疫為由對參與者作出罰款。



國安法實施後，港府亦係原有法律入面，重新啟用塵封半世紀嘅殖民地法律《串謀發布煽動刊物罪》。2021年7月，警方國安處拘捕言語治療師總工會5名理事，指控佢哋出版嘅繪本煽動兒童憎恨政府。依啲繪本嘅主題涵蓋反送中運動、十二港人案、醫護罷工，從無權者嘅角度出發，向下一代傳承香港人嘅歷史記憶。





同時，香港公共圖書館以館藏可能違反國安法為由，將批判政權嘅書籍陸續下架。被下架嘅書籍包括支聯會早係主權移交前出版、一系列具歷史意義嘅八九民運相關刊物。香港正式步入禁書時代。

2021年9月，警方國安處破門搜掠並破壞六四紀念館，悉數沒收館方多年收藏嘅展品同文獻，更將館址所在嘅物業凍結。六四紀念館由支聯會籌辦，翔實記述八九民運嘅來龍去脈，更展有六四死難者嘅遺物，多年嚟肩負傳承歷史真相嘅使命。



網上圖片



為配合政權，各間大學紛紛移除校園內嘅六四紀念碑，包括香港大學嘅國殤之柱、中文大學嘅民主女神像、嶺南大學嘅天安門大屠殺浮雕。全賴前人護送，依啲紀念碑先可以落戶校園，但極權步步進迫，佢哋亦再無容身之處。

依場係一場記憶對抗遺忘嘅鬥爭。
當我哋嘅歷史記憶無法宣之於口，
當我哋嘅公民社會分崩離析，
地下化或者係無可奈何下嘅選擇。
但即使佢哋幾咁無孔不入都好，必須相信，
有啲地方我哋永遠都係自由嘅。



我哋需要你嘅支持
將羊村繪本印成實體
讓香港故事傳得更遠

The Sheep Villagers needs your support.
We are working on a printed version to
share the stories with more people.

點擊前往 Click to Contribute

 patreon.com/sheepvillage



三隻小羊終於起好自己嘅屋仔喇！
點知大灰狼竟然宣佈話，
要得佢批准先可以起屋仔，
仲要拆晒佢唔鐘意嘅屋！

面對大灰狼嘅新規矩，
三隻小羊又可以點做呢？

親子共讀：4-7歲
自行閱讀：7歲以上

